

իրար ազգական գերդաստանները, այդ բազմանդամ ծխէրը հավանական է, որ մեծ մասամբ դեռ զետեղված էին լինում միեւնոյն թաղում, իրարից ոչ հեռու: Այդպես էր օրինակ՝ Խնձորեսկում⁹: Այսպիսի թաղի մեջ դրկիցության և ազգակցության կապերն իրար հետ խաչաձևվում էին, և դրանց կից մշակվում էին միջքաղային փոխհարաբերությունների ձևերը: Միջքաղային համակեցությունը նորմավորող սովորությունները մեր գիտարշավները անկարող եղան գրանցել: Դրանք արդեն ջնջվել էին ծերունիների հիշողությունից: Հաջորդ ժամանակաշրջանում, վաշխառուական կապիտալի զարգացման հետևանքով, երբ տեղի էր ունենում խոշոր գերդաստանների մանրացման պրոցեսը և գյուղում գերիշխանություն էր ստանում փոքր ընտանիքով ապրելու սովորությունը, ավելի և ավելի ծավալվում և բարդանում էր հարևանության բարոյախոսությունը: Խոշոր գերդաստանի քայքայվելը և մանր ընտանիքների բաժանվելն արդեն մինչև սովետական իրավակարգի հաստատվելը Զանգեզուրի բոլոր գյուղերում դարձել էր համատարած երևույթ: Միայն կոլտնտեսային շինարարությունը վերջնական հաղթանակը տվեց այն ձևին, որտեղ ընտանիքը կազմված է մեկ ամուսնական զույգից և նրա անմիջական առաջին սերունդից, որի չափահասությունը հասած անդամները ձգտում են ամուսնանալուց հետո ծնողներից անջատվել և ապրել սեփական տնով, ունենալով սեփական եկամուտներ, առանձին աշխօրներ:

1823 թ. Մոգիլևսկին և Երմոլով Զ-ըդը Ղարաբաղի պրովինցիայի բնակավայրերը և նրանց վճարած պետական տուրքերը ցուցակագրելիս¹⁰ տալիս են այդ բնակավայրերի ծխէրի՝ ընտանիքների թվերը, որոնք աչքի են ընկնում իրենց փոքրությամբ: Դա բացատրվում է որոշ չափով նրանով, որ նրանց ժամանակվա ծուխը բազմանդամ էր: Դրան նպաստում էր և այն հանգամանքը, որ թե՛ պետական և թե՛ կալվածատիրական տուրքերը գանձվում էին, ինչպես և հասարակական պարտականությունները բաշխվում էին խանական կառավարության օրով ըստ ծխէրի, առանց աչքի առաջ ունենալու նրանց ապահովվածությունը հողերով, ինվենտարով, անասունով:

Եթե այդ թվերը համեմատելու լինենք 1931 թ. սովետական ժամանակի թվերի հետ, կտեսնենք ծխէրի թվերի չափազանց մեծ աճը: Այսպես, 1823 թ. և 1931 թ. համեմատությունը տալիս է հետևյալ պատկերը. (աղյուսակ 6):

Գորիսի ծխէրի ահագին ավելացումը, իհարկե, պետք է վերագրել այն քանին, որ Գորիսը վեր էր ածվել գավառի վարչական կենտրոնի, իսկ մյուս գյուղերում թվերի տարբերությունը հետևանք էր ոչ միայն բնական աճի, այլև առանձնապես 1823 թ. հետո տեղի ունեցած ծխէրի մանրանալուն: Ռուսական տիրապետության հաստատումից հետո, XIX դ. և XX դ. սկզբներին, ավելի քան մեկ հարյուրամյակի ընթացքում հին գերդաստանային սիստեմի քայքայման պրոցեսը ընթանում էր Զանգեզուրում ավելի դանդաղ, քան թե Անդրկովկասի այն գավառներում, որտեղ այդ տիրապետությունը, բարելավելով հաղորդակցության հարմարությունները, ավելի վաղ էր կապ հաստատում տեղական տնտեսության և ռուսական շուկայի միջև: Զանգեզուրը երկար տարիներ մնաց այդ գլխավոր ճանապարհներից դուրս, մեկուսացած: Պետական

⁹ Շատ բնորոշ է թաղերի կազմը Ախալքալակի շրջանի Կարծախ գյուղում, որտեղ ազգակցությամբ ներքուստ շաղկապված թաղը տեղավորված է մի ալլ նման թաղից բավականին հեռու, անջատված:

¹⁰ «Описание Карабахской провинции».